

Aventüra musicala a Ftan

La Società da musica Ftan ha fat quist invern ün experimaint musical cun ün nouv president e trais nouv dirigents. Il manader musical Severin Paul Brugger ha persvas cun talent, bunascha e blera fiduzcha in sai sves. L'experimaint es gratjè e fa spranza per l'avegnir.

NICOLO BASS

Sco sch'el nu vess mai fat alch oter: il giuven manader musical da la Società da musica Ftan, Severin Paul Brugger, ha manà in sonda saira cun bunascha e blera fiduzcha in sai sves tras il program da concert. El nun ha be dirigi la gronda part dals tocs, el ha güst'eur surtut amo la moderaziun da quels. Eir seis möd da diriger la musica ha surprais: Coolischem e cun leivezza ha el manà la bachetta e motivà las musicantas ed ils musicants da sunar cun plaschair. Forsa cha minchatant d'eira il teater musical bod massa exagerà, ma in mincha cas haja fat plaschair da verer l'ingaschamaint dal giuven musicist paschiunà cun grondas ambiziuns.

Experimaint cun trais dirigents

Daspö duos on es la Società da musica Ftan in tschercha d'ün nouv dirigent. L'on passà ha Martin Stecher surtut la bachetta per ün temp limità. Quist on da musica han lura decis ils respunsabels da la società per ün experimaint. Trais musicants han surtut il timun: Severin Paul Brugger – chi nun ha avant amo mai dirigi üna musica – ha surtut la rolla da manader musical. El es gnü sustgnü da Fadri Caprez e da Serafin Caprez, chi s'han eir partecipats quist invern al cuors da dirigents chi'd es gnü organisà dal District da musica I. Per els duos es stat il concert da sonda



Severin Paul Brugger ha surtut la sfida musicala ed ha preschantà culla Società da musica Ftan il früt da la lavor da quist invern.

fotografia: Nicolo Bass

passada sco ün examen final dal cuors da dirigent. Minchün dad els ha dirigi ün toc e l'applaus dal public es stat la conferma e l'indemnisaziun per lur ingaschamaint. Cul squitsch da la premiera nun han els savü zoppantar dal tuot l'agitaziun da lur prüm act public culla bachetta in man.

La mort o la gloria

Il manader musical Severin Paul Brugger ha miss il concert suot il titel d'ün'aventüra musicala. Quai impstüt causa la sfida musicala da l'invern passà e l'experimaint cun trais dirigents sainza experienzas. Perquai

es stat il titel dal prüm toc cha las musicantas ed ils musicants han preschantà eir simbolic, nempe «Death or Glory». La Società da musica Ftan nun es insomma brich morta, il concert annual da sonda passada ha suottastrichà la gloria da quista società. «La via cuntinua ed il plaschair da far musica es avantman», ha constatà eir il nouv president da la musica da Ftan, Martin Wallnöfer. Chi detta adüna üna soluziun per cuntinuar han muossà las musicantas ed ils musicants da Ftan cun preschantar l'ouvra Bliss da Jacob de Haan. Quist toc vess la Società da musica Ftan nempe vuglù sunar a la

fešta da musica districtuala dal 2020 a Zernez. Quella jada es la fešta gnüda sditta giò causa la pandemia da covid. Uossa – ses ons plü tard – han las giuvenas musicantas e musicants da Ftan preschantà la chanzun cun ün nouv dirigent. Il public ha gnü plaschair eir da las melodias plü cuntshaintas, per exaimpel cul arrandschamaint dad Abba Gold o culla Fuchsgraben Polka. L'aventüra musicala a Ftan ha gnü ün Happy End. E co cha'l president da la musica da Ftan ha tradi a la fin dal concert, cuntinua la collavuraziun cul manader da musica talentà eir l'on chi vain. E fin quella jada han eir ils duos

ulteriurs nouv dirigents ramassà daplü experienza e pon surtour amo daplü respunsabilità musicala illa Società da musica Ftan. Ils pissers per l'avegnir da la società cun tantas pussibilitats e musicantas e musicants giuven sun invan.

Cun scannar il code QR as survain ün'impreschiun dal concert da la Società da musica Ftan.



Arrandschamaint

La musica viva per la Büvetta a Nairs

Scuol Palace Illa votumaziun a l'urna dals 19 avrigl decida la populaziun da Scuol davart l'avegnir da la Büvetta a Nairs chi'd es serrada daspö il 2006 per motivs da sgürezza. La Pro Büvetta Tarasp ha elavurà insembel culla chüra da monumaints ün proget da sanaziun per la Büvetta. Ils cuosts da fabrica pel proget cumpleviss s'amuntan a raduond 18 milliuns francs, pel cumün da Scuol restan cuosts da raduond 20 pertschient. Per sustgnair la sanaziun da la Büvetta organi-

sescha la musicista Cinzia Regensburger in dumengia, ils 12 avrigl, ün arrandschamaint da «Viva la musica» i'l Hotel Palace a Nairs. Da las 14.00 fin las 20.00 as preschaintan üna dunzaina da gruppas al concert da benefiz a favur da la Büvetta. Il cumanzamaint fa Paulin Nuotclà a las 14.00. Ad el seguan Ernst Bromeis, Cinzia Regensburger cun differentas scolaras da la scoula da musica Engiadina Bassa, Isabella Kania, il cor dal proget Scuol Classics 2026, il Coro viril En-

giadina Bassa, e las gruppas Che Bo, Ils 7 Nanins e Mi'Amia. La sairada finischa lura cul DJ Noon.

L'entrada es gratuita, la collecta va a favur da la Büvetta a Nairs cul böt da pussibilitar in avegnir darcheu degustaziuns, concerts ed arrandschamaints culturals i'l stabilimaint istoric. Dürant tuot l'occurranza preschainta la società Pro Büvetta Tarasp ün'exposiziun da fotografias ed in fuormescha davart il proget da sanaziun. (protr.)

Rendaquint meglder co anticipà

Regiun EBVM La Conferenza dals presidents da la Regiun Engiadina Bassa Val Müstair ha trattà e deliberà in gövgia passada il rendaquint dal 2025. Tenor comunicaziun da medias resultan in quel expensas da s-chars 4,6 milliuns francs pro entradas da bundant 2,2 milliuns francs. Büdscheta i'l preventiv dal 2025 d'eira ün deficit da var 230000 francs plü ot. Il surplü d'expensas da s-chars 2,4 mil-

liuns francs surpiglian ils singuls cumüns da la regiun tenor la clav da scumpart.

Congualond il rendaquint actual cun quels dals ultims tschinch ons as muossa ün constant augmaint d'expensas, da bundant 4,1 milliuns francs l'on 2021 sün uossa s-chars 4,6 milliuns francs. Las entradas varieschan in quella perioda tanter 2,1 e 2,6 milliuns francs. (cdm/fmr)

Ursina Caviezel demischiunescha

Valsot Per la suprastanza cumünala da Valsot es necessaria amo quist'on ün'elecziun complementara perquai cha Ursina Caviezel demischiunescha da quella per la fin da l'on. Quai ha la suprastanza cumünala comunicà i'l protocol da sia sezzüda dals 11 marz 2026.

Ursina Caviezel es gnüda eletta l'on 2016 illa suprastanza da Valsot e davo reeletta per duos ulteriuras periodas d'uffizi dal 2020 e 2024. Intant es ella respunsabla pel departamaint da god, vias e chavas. Ün termin d'elecziun per sia substituziun nun ha il cumün intant amo defini. (cdm/fmr)

Romanische News
auf Deutsch lesen!

ÜBERSETZUNGSSERVICE FÜR ABONNENT:INNEN

Ausgewählte romanische Artikel übersetzen wir auf Deutsch. Diesen Service speziell für Abonnent:innen bieten wir online auf engadinerpost.ch.

So funktioniert es: engadinerpost.ch aufrufen, einloggen, romanischen Artikel mit Übersetzungssymbol auswählen, deutschen Text anzeigen lassen.

Viel Freude beim erweiterten Lesevergnügen auf engadinerpost.ch!

Infos:

FMR FUNDAZIUN MEDIAS RUMANTSCHAS | Engadiner Post

Buna lectüra!
Desch baccunins rumantschs

per nossa lingua

Lia Rumantscha | Engadiner Post

www.engadinerpost.ch

Ingio cha Nicolo Bass es sül lö